

11.6.1981

# Kemenangan Dr. M sudah diramal

ALOR SETAR, Rabu — Pergerakan Pemuda UMNO Negeri Kedah telah menduga dari awal lagi Timbalan Perdana Menteri Datuk Seri Dr. Mahathir Mohamad menang tanpa bertanding untuk menyandang Presiden UMNO Malaysia menggantikan Datuk Hussain Onn.

Ketua Pergerakan itu, Haji Hanafi bin Ramli memberitahu hari ini, jawatan Presiden UMNO telah menjadi tradisi dalam UMNO dimenangi tan-

pa bertanding.

Belliau berkata, amalan seperti ini menunjukkan betapa kuatnya perpaduan dan sokongan di kalangan tokoh-tokoh UMNO terhadap pucuk pimpinan parti.

Menurutnya, kejayaan Datuk Seri Dr. Mahathir juga menunjukkan sokongan bulat dari seluruh anggota UMNO terhadap pimpinannya.

"Saya sebagai Ketua Pergerakan Pemuda UMNO Kedah menyampaikan uca-

pan tahniah atas kejayaan itu dan memberikan kerjasama penuh serta berdiri teguh di belakang beliau," katanya.

Pergerakan Pemuda UMNO Negeri, tegasnya, berdoa serta mengharapkan di bawah pimpinan Datuk Seri Dr. Mahathir, UMNO akan mencapai kejayaan cemerlang seperti yang telah dicapai oleh Tunku Abdul Rahman, Alahyarham Tun Razak dan Datuk Hussein Onn.

Sementara itu, seorang jurucakap UMNO negeri memberitahu, UMNO Kedah akan menghantar 143 orang perwakilan ke Perhimpunan Agung UMNO Malaysia pada 26 Jun ini.

Mereka mewakili 14 Bahagian UMNO seluruh negeri yang diketuai oleh Menteri Besar Datuk Seri Syed Nahar Shahabuddin, Ketua Perhubungan UMNO Negeri.

Bahan asal dari Arkib  
Negara Malaysia